

摘藻堂四庫全書薈要

集部

欽定四庫全書薈要卷一萬八千九百十九

集部

御定佩文齋詠物詩選卷二百九十七

梅花類

五言古

贈范蔚宗

宋陸凱

折花逢驛使寄與隴頭人江南無所有聊贈一枝春

雪裏覓梅花

梁簡文帝

絕訝梅花晚爭來雪裏窺下枝低可見高處遠難知俱

羞惜腕露相讓到腰羸定須還剪綵學作兩三枝

梅花

梁吳均

梅性本輕蕩世人相陵賤故作負霜花欲使綺羅見但願深相知千摧非所戀

同蕭左丞詠摘梅花

梁庾肩吾

窻梅朝始發庭雪晚初消折花牽短樹攀叢入細條垂冰溜玉手含刺冒春腰遠道終難寄馨香徒自饒

雪裏梅花

陳陰鏗

春近寒雖轉梅舒雪尚飄從風還共落照日不俱銷葉
開隨足影花多助重條今年漸異昨向晚判勝朝

梅花落

陳
蘇子卿

中庭一樹梅寒冬葉未開祇言花是雪不悟有香來上
郡春恒晚高樓年易催纖書偏有意教逐錦文回

梅花

北周
庾信

當年臘月半已覺梅花闌不信今春晚俱來雪裏看樹
動懸冰落枝高出手寒早知覓不見真悔著衣單

早梅

唐 柳宗元

早梅發高樹，迴映楚天碧。
朔吹飄夜香，繁霜滋曉白。
欲爲萬里贈，杳杳山水隔。
寒英坐銷落，何用慰遠客。

訪梅

宋 徐璣

訪梅行近郊，寒氣初漸瀝。
欲開未開時，三點兩點白。
清枝何蕭疎，幽香况岑寂。
頗知天姿殊絕，似人有德逢君。
天一方歡然舊相識。

移梅

元 馬祖常

幽屏逐魚鳥沈跡儔隱淪所欣在林藪嘉植日以親眷
言江介品紛葩號南珍遇我好竒服移根得良因井井
十畝園菁茅陰澗濱縞裳擢玉質宜此空山春

其二

植爾當庭隅豈復資鼎味遷爾自谷中豈復相嫵媚列
列玄冥候衆植各浮脆高標自凌寒孤尚獨冠歲么禽
何處來飛下雙羽翠

探梅分韻得香字

元于石

絕壁兩屨雲荒邨半橋霜孤往欲何之林下幽徑長寒
梅在何許臨風幾徜徉誰家斷籬外一枝寄林塘水靜
不搖影竹深難護香無言獨倚樹山空月荒涼

題墨梅

元傅若金

老樹亞晴空疎花帶寒野風流不自惜澹泊從人寫歲
晏孰能娛空山少來者

其二

孤花何婉婉玉立含幽素短短時出橋疎疎或臨路生

疑簷下月半照牆西樹

題竹外一枝梅花

元黃清老

仙標何處來一枝倚寒玉晴窓見疎林座上春可掬山陰帶殘雪水影兼遠綠珍重孤竹君歲寒伴幽獨

七言古 附長短句

梅花落

宋鮑照

中庭雜樹多偏為梅咨嗟問君何獨然念其霜中能作花露中能作實搖蕩春風媚春日念爾零落逐寒風徒

有霜華無霜質

看梅

隋侯夫人

砌雪無消日捲簾時自蟬庭梅對我有憐意先露枝頭
一點春

郡泊燕堂庭中梅花

宋楊萬里

林中梅花如隱士只多野氣無塵氣庭中梅花如貴人
也無野氣也無塵不疎不密隨宜了旋落旋開無不好
珠簾遣風細為吹畫簷護霜寒更微詩翁繞階未得句

先送詩材與翁語有酒如澠誰伴翁玉雪對飲惟渠儂
翁欲還家即明發更為梅兄畱一月

籌堂尋梅

金李俊民

蕭疎籬落誰家圃尋芳信逐遊蜂去眼前荊棘少人行
馬蹄直到香來處怕愁貪睡獨開遲瘦損春寒鶴膝枝
可是東君苦留客斜風細雨不堪詩

陪于思庸訓導登道山亭觀梅用坡仙韻

元朱德潤

道山亭下梅花邨坡仙作詩為招魂明姿照人隔寒水
瘦影帶月欺黃昏先生頗厭郡齋冷持書晚約窺山園
松風吹香清人骨地鑪煙銷酒初溫孤標已出羣卉上
故遣雪意迷晴曦和羹結子時較晚先傳春色來衡門
天寒谷幽翠袖薄豈知春鳥能傳言明晨看花重有約
呼童掃石羅清尊

題梅花

明王冕

江南十月天雨霜人間草木不敢芳獨有谿頭老梅樹

面皮如鐵生光芒朔風吹寒珠蕾裂千花萬花開白雪
彷彿蓬萊羣玉妃夜深下踏瑤臺月銀鐺泠泠動清韻
海煙不隔羅浮信相逢共說歲寒盟笑我飄流霜滿鬢
君家秋露白滿缸放懷飲我千百觴興酣脫帽恣盤礴
拍手大叫梅花王五更窻前博山冷么鳳飛鳴酒初醒
起來笑抱石丈人門外白雲三萬頃

竹堂寺探梅

明沈周

竹堂梅花一千樹晴雪塞門無入處秋官黃門兩詩客

珂馬西來為花駐老翁攜酒亦偶同花不留人人自住
滿身毛骨沁冰影嚼蘂含香各搜句酒酣塗紙作橫斜
筆下珠光濕春露只愁此紙捲春去明日重來花在地

五言律

詠梅

唐李嶠

大庾斂寒光南枝獨早芳雪含朝暝色風引去來香
粧面迴青鏡歌塵起畫梁若能遙止渴何假泛瓊漿

和常州崔使君詠後庭梅

唐孫逖

聞唱梅花落江南春意深更傳千里外來入越人吟弱
榦紅粧倚繁香翠羽尋庭中自公日歌舞向芳陰

江梅

唐杜甫

梅蘂臘前破梅花年後多絕知春意早最奈客愁何雪
樹元同色江風亦自波故園不可見巫岫鬱嵯峨

山路見梅感而有作

唐錢起

莫言山路僻還被好風催行客淒涼過邨籬冷落開晚
谿寒水照晴日數蜂來重憶江南酒何因把一杯

生春

唐元稹

何處生春早春生梅援中藥排難犯雪香乞擬來風隴
迴羌聲怨江遙客思融年年最相惱緣未有諸叢

早梅

唐朱慶餘

天然根性異萬物盡難陪自古尋春早嚴冬鬪雪開
寒宜雨露香冷隔塵埃堪把依松竹良塗一處栽

聞薛先輩陪大夫看早梅因寄

唐許渾

澗梅寒正發莫信笛中吹素艷雪凝樹清香風滿枝折

驚山鳥散攜任野蜂隨今日從公醉何人倒接羅

梅

唐杜牧

輕盈照谿水掩斂下瑤臺妒雪聊相比欺春不逐來偶
同佳客見似為凍醪開若在秦樓畔堪為弄玉媒

江梅

唐鄭谷

江梅且緩飛前輩有歌詞莫惜黃金縷難忘白雪枝吟
看歸不得醉嗅立如癡和雨和煙折含情寄所思

早梅

唐熊皎

江南近臘時已亞雪中枝一夜欲開盡百花猶未知人
情皆共惜天意不教遲莫訝無濃艷芳筵正好吹

早梅

唐
僧齊己

萬木凍欲折孤根煖獨回前邨深雪裏昨夜一枝開風
遞幽香去禽窺素艷來明年如應律先發映春臺

清江道中見梅

宋
朱子

今日清江路寒梅第一枝不愁風嫋嫋正奈雪垂垂煖
熱惟須酒平章却要詩他年千里夢誰與寫相思

和羅巨濟山居

宋楊萬里

園花皆手植梅蘂獨禁寒色與香無價飛和雪作團數
枝橫翠竹一夜遶朱闌不惜吟邊苦收將句裏看

尋梅

明張羽

策杖度林塘幽尋犯曉霜臨池疑掩映傍竹畏遮藏欸
曲敲僧舍徘徊繞苑牆好攜三弄笛樹底為催粧

鄧尉看梅

明王穉登

人似梅花瘦舟如蘭葉長青山十畝白流水一春香種

密人難入開齊夜有光苔枝容我折野老不嗔狂

其二

橋外花開日分明雪作圖不將他樹雜未有一家無多
處半青嶂香時過太湖濁醪元易得市遠亦須沽

約王子看梅

明

陸承憲

梅花動山意野客不勝情長夜思瓊樹青春懷友生雨
中開欲盡風處落能輕即遣山陰棹還同雪裏行

湖上梅花

陸承憲

不獨山中有還從湖上偏全將雪嶂影倒盡玉湖天花
落鷗羣亂香浮雨氣鮮山僧開閣坐相對一蕭然

瓶梅

明譚元春

入瓶過十日愁落幸開遲不借春風發全無夜雨欺香
來清淨裏韻在寂寥時絕勝山中樹遊人或未知

五言排律

華林園早梅

唐鄭述誠

曉日東樓路林端見早梅獨凌寒氣發不逐衆花開素

彩風前艷韶光雪後催藥香霑紫陌枝亞拂青苔止渴
曾為用和羹舊有才含情欲攀折瞻望幾徘徊

詠神樂觀梅花

明陳束

素質舒玄圃清芬裊碧紗自將幽獨意不逐艷陽華避
煖遲開葉凌寒早著花瓣輕飄易墮枝曲影從斜雜雪
明春砌隨風入暮笳何須飛寶靨長此奉仙家

七言律

和薛秀才尋梅花同飲見贈

唐白居易

忽驚林下發寒梅便試花前飲冷杯白馬走迎詩客去
紅筵鋪待舞人來歌聲怨處微微落酒氣熏時旋旋開
若到歲寒無雨雪猶應醉得兩三迴

岸上梅

唐崔櫓

含情含怨一枝枝斜壓漁家短短籬
惹袖尚餘香半日向人如訴雨多時
初開偏稱雕梁畫未落先愁玉笛吹
行客見來無去意解帆煙浦為題詩

湖南梅花一冬再發偶題於花援

唐

韓偓

湘浦梅花兩度開，直應天意別栽培。
玉為通體依稀見，香號返魂容易迴。
寒氣與君霜裏退，陽和為爾臘前來。
妖桃莫倚東風勢，調鼎何曾用不材。

鈴兵王閣使素芳亭賞梅花

宋趙抃

素萼清香並酒卮，主人勤意囑留詩。
為逢蜀國新開日，却憶江南舊賞時。
春密未通桃李信，臘殘都放雪霜姿。
先公舊植亭欄外，肯構重來見本枝。

山園小梅

宋林逋

衆芳搖落獨暄妍，占盡風情向小園。
疎影橫斜水清淺，暗香浮動月黃昏。
霜禽欲下先偷眼，粉蝶如知合斷魂。
幸有微吟可相狎，不須檀板共金尊。

其二

剪綃零碎點酥乾，向背稀稠畫亦難。
日薄縱甘春至晚，霜深應怯夜來寒。
澄鮮祇共鄰僧惜，冷落猶嫌俗客看。
憶著江南舊行路，酒旗斜拂墮吟鞍。

其三

數年間作園林主未有新詩到小梅摘索又開三兩朵
團欒空繞百千迴荒鄰獨映山初盡晚景相禁雪欲來
寄語清香少愁結為君吟罷一銜杯

梅花

林逋

小園煙景正淒迷陣陣寒香壓麝臍湖水倒窺疎影動
屋簷斜入一枝低畫名空向閒時看詩客休徵故事題
慚愧黃鸝與蝴蝶祇知春色在桃谿

與微之同賦梅花得香字

宋王安石

漢宮嬌額半塗黃
粉色凌寒透薄妝
好借月魂來映燭
恐隨春夢去飛揚
風亭把盞酬孤艷
雪徑回輿認暗香
不為調羹應結子
直須留此占年芳

答戲昭文梅花

宋朱棁

臘到方留此日寒
雨多未覺過雲殘
共驚臺柳慙慙去
獨抱園花細細看
洗面不勞千點雪
熏衣剝破一分檀
詩人窮苦誰料理
只倚東風酒量寬

戊申元日立春題道山堂前梅花

宋楊萬里

今年元日不孤來帶領新春一併回夜雨初添石渠水
東風先入道山梅不妨數朵且微破未要十分都放開
江路野香原自好阿誰攜取種蓬萊

梅

宋 徐璣

是誰曾種白玻璃
覓絕寒荒一點奇
不厭隴頭千百樹
最憐窗下兩三枝
幽深真似離騷句
枯健猶如賈島詩
吟到月斜渾未已
蕭蕭鬢影有風吹

梅

宋 戴復古

孤標粲粲壓羣葩，獨占春風管歲華。
幾樹參差江上路，數枝粧點野人家。
冰池照影何須月，雪岸聞香不見花。
絕似林間隱君子，自從幽處作生涯。

山中見梅寄曾無疑

戴復古

香動寒山寂寞濱，直從空谷見佳人。
樹頭樹底參差雪，枝北枝南次第春。
有此瑰琦在巖壑，其他草樹亦精神。
移根上苑誰云晚，桃李依然在後陳。

梅

元劉清叟

休說逋仙兩句工冰甌滌筆別形容清標騷客風前立
素面仙姝月下逢山店霜寒香撲馬谿橋水淺影如龍
一枝盡是寒凝結金鼎無鹽味更濃

其二

除香除影賦梅花方許詩中擅作家怕俗似嫌羔作酒
高人頗稱雪煎茶參橫屋角霜初下人倚闌干月欲斜
夜冷玉肌愁入骨金壺移入伴窓紗

江邊梅樹

元劉秉忠

江邊繚繞惜芳叢絕筆天真在眼中素艷乍開珠蓓蕾
暗香微度玉玲瓏一枝倒影斜斜月滿樹浮光細細風
明日行經山下路幾回特地駐青驄

謝徐容齋贈梅

元王惲

燕釵宮額蠟粧勻夢繞羅浮雪裏邨持贈一枝遮老眼
淡依疎影度黃昏風流燈下佳人面瀟灑吟邊竹葉樽
我老忘情被花惱曲屏深鎖惜芳溫

謝書巢惠梅花

元虞集

巢翁遠送梅花樹正在東風四日前紅萼無言餘舊雪
白頭相見又新年喜從嘉樹來江雨憶共香杭上海船
春夜不眠賓客醉只留孤鶴伴清妍

次王本中燈夕觀梅

元薩都拉

翠禽偷夢出南園綽約冰姿傍綠樽冰鏡玉釵浮翠影
風簾銀燭照粧痕粉香微潤無人見素質多寒藉酒溫
不似海棠春睡去西樓月落已黃昏

蟠梅

元謝宗可

縈青絳碧裂蒼苔歲晏寒香宛轉來
蛟蟄凍雲冰骨瘦
龍眠夜月玉鱗開風霜氣勢從千折
鐵石心腸亦九迴
祇為東君甘自屈不教枉占百花魁

水中梅影

謝宗可

澄澄寒碧映冰條雲母屏開見阿嬌
春色一枝流不去
雪痕千點浸難消臨風倚檻雲鬟濕
帶月凌波玉珮搖
最是黃昏堪畫處橫斜清淺傍谿橋

鴛鴦梅

謝宗可

兩兩魁春簇錦機文衾夢覺月分輝枝頭交頸棲香煖
花底同心結子肥金殿鎖煙粧粉額玉堂環水浴紅衣
有情一種隨流去莫被風飄各自飛

二月梅

元雅勒呼

去年呵筆賦寒梅又見仙家二月開不是東君留客醉
肯教神女逐春回梨花院落為雲妒柳絮池塘作雪猜
東閣如今清興減羅浮誰與寄香來

二月江城見梅

元葉顥

二月江城第一枝怕寒故故著花遲不嫌艷杏夭桃俗
甘受狂蜂妒蝶疑月落西湖驚舊夢雪消南國憶當時
樓頭亦有霜天角嬾對春風煖日吹

其二

桃杏紛紛正得時疎梅高潔合知幾如何萬卉嬌春日
猶有孤芳駐夕暉未要板橋尋蠟屐最宜沙路試羅衣
輕鞵小扇孤山下絕勝逋仙踏雪歸

落梅

元僧善住

晴雪霏霏灑砌苔
浪蜂欲去更徘徊
空傳淡影浮歌扇
不送寒香入酒杯
隴首故人千里隔
江南驛使幾時回
翠禽莫怨高樓笛
一度春風一度開

鏡中梅

明袁凱

的皪孤芳野水濱
折來應是曉妝人
瑤池風煖香初散
銀漢春回跡未真
奔月定知猶有影
凌波却喜不生塵
綠毛么鳳無棲處
來往蘭房不厭頻

梅花

明高啓

瓊姿只合在瑤臺誰向江南處處栽雪滿山中高士卧
月明林下美人來寒依疎影蕭蕭竹春掩殘香漠漠苔
自去何郎無好詠東風愁寂幾回開

其二

縞袂相逢半是仙平生水竹有深緣將疎尚密微經雨
似暗還明遠在煙薄暝山家松樹下嫩寒江店杏花前
秦人若解當時種不引漁郎入洞天

其三

斷魂祇有月明知無限春愁在一枝不共人言惟獨笑
忽疑君到正相思歌殘別院燒燈夜粧罷深宮攬鏡時
舊夢已隨流水遠山窓聊復伴題詩

其四

翠羽驚飛別樹頭冷香狼藉倩誰收騎驢客醉風吹帽
放鶴人歸雪滿舟淡月微雲皆似夢空山流水獨成愁
幾看疎影低回處只道花神夜出遊

次韻西園公詠梅

高啓

如何天與出塵姿不得芳名入楚辭
春後春前曾獨探
江南江北每相思
微雲淡月迷千樹
流水空山見一枝
擬折贈君供寂寞
東風無那欲殘時

梅澗

明
李東陽

地僻沙寒水更清
老梅偏向澗邊橫
風吹落瓣仍低隕
石壓傍枝却倒生
野鶴對人輕欲舞
寒驢衝雪瘦能行
山翁只在中老看
盡春光不入城

詠園中梅花

明
皇甫濂

上月青陽啓曙暉
園梅變臘識春歸
花猶並雪凌芳遍
葉似含情弄影微
素落機前紈自怯
香分奩外鏡堪依
由來物序兼愁思
一詠何郎欲和稀

梅影

明
朱之蕃

斗帳香浮月欲斜
縱橫疎密徧窓紗
恍疑姑射仙姬步
來訪西湖處士家
轉盼含情仍逞態
全欺琢玉更蒸霞
谿藤點筆留芳韻
書幌銀釭不用遮

梅

朱之蕃

東皇著意布三陽
點綴疎枝弄早芳
刻玉鏤冰無俗韻
鉤簾汎坐有餘香
卧遊瘦嶺雲橫路
夢到西湖雪映堂
相對傾樽明月上
行吟繞樹不知忙

老梅

朱之蕃

空巖曲折挂蒼蚪
骨幹峻嶒韻致幽
閣淡翰香宜紙帳
森疎濯影向谿流
嬾隨艷冶榮千樹
獨葆清真隱一丘
自有松篁深結契
江天春柳任輕柔

送梅

明許陞

爛漫南枝與北枝殘香落落影離離多情明月還相照
無賴狂風且莫吹縱飲不辭今日醉算開猶是隔年期
最憐今夜黃昏後寂寞微吟倚樹時

雪中梅花

明王穉登

二月春光雪尚飄看梅獨坐思無聊銀花亂綴難分萼
玉樹交加莫辨條粉似傳來容易褪香偏留却不同消
一般飛入粧臺裏獨讓殘英點額嬌

天平道中看梅呈陸丈

王穉登

新春日日雨霏霏
雨後尋春願不違
花近翠微苔作樹
人行香徑雪生衣
折從野岸俱無主
開入僧家盡掩扉
誰似大人能好事
衝風踏凍不言歸

題語谿郁振公梅花草堂

明程嘉燾

竹寒沙碧堂成處
移得官梅繞屋栽
未到花時留客坐
恰當人日寄詩來
出郊路熟香偏早
傍舍春生水正迴
湖畔垂垂天欲雪
鄉愁驛信兩相催

其二

何人曾送草堂賢
幾首巡簷索笑詩
東閣去逢春動候
西谿邀宿月明時
山空翠袖禁寒薄
雪緊青燈放燄遲
煙角霜鐘斷消息
窓前一夜為相思

九言律

九字梅花詠

元僧明本

昨夜西風吹折千林梢
渡口小艇滾入沙灘坳
野橋古梅獨卧寒屋角
疎影橫斜暗上書窓敲
半枯半活幾箇
壓蓓蕾欲開未開數點含香苞
縱使畫工奇妙也縮手

我愛清香故把新詩嘲

詠梅

明楊慎

昨夜小春十月微陽回綠萼梅蕊早傍南枝開折贈未
寄陸凱隴頭去相思忽到盧仝窓下來歌殘水調沈珠
明月浦舞破山香碎玉凌風臺錯恨高樓三弄叫雲笛
無奈二十四番花信催

五言絕句

江濱梅

唐王適

忽見寒梅樹花開漢水濱不知春色早疑是弄珠人

梅谿

唐韋處厚

夾岸凝清素交枝漾淺淪味調方薦實臘近又先春

梅灣

唐顧況

白石盤盤磴清香樹樹梅山深不吟賞辜負委蒼苔

梅谿

唐張籍

自愛新梅好行尋一徑斜不教人掃石恐損落來花

憶梅

唐李商隱

定定住天涯依依向物華寒梅最堪恨長作去年花

梅花

宋王安石

牆角數枝梅凌寒獨自開遙知不是雪為有暗香來

梅堤

宋朱子

仙人冰雪姿貞秀絕倫擬驛使詎知聞尋香問煙水

觀梅

宋戴敏

三杯暖寒酒一榻竹亭前為愛梅花月終宵不肯眠

梅

金李俊民

未報江南信先開雪裏邨要看花上月立馬待黃昏

問梅

元張昱

一種隴頭樹東風都合吹未應造物者偏在向南枝

梅

元鄭允端

歲寒冰雪裏獨見一枝來不比凡桃李春風無數開

六言絕句

曹得一扇頭

金元好問

機中秦女仙去月底梅花晚開只見一枝疎影不知何

處香來

早梅

元趙次誠

江南冬十二月谿上梅
三兩花載取小舟香影月明自棹回家

題柯敬仲梅

元杜本

點點苔枝綴玉疎疎檀藥凝香還記當年月色蕭聲暗度宮牆

靈谷寺梅花塢

明焦竑

山下幾家茅屋邨中千樹梅花藉草持壺燕坐隔林敲
石煎茶

其二

簷蔔林東短牆曾開寶地齊梁初春老樹花發深澗無
入水香

七言絕句

早梅

唐戎昱

一樹寒梅白玉條迴臨邛路傍谿橋應緣近水花先發

疑是經春雪未消

竹裏梅

唐 劉言史

竹裏梅花相並枝
梅花正發竹枝垂
風吹總向竹枝上
直似王家雪下時

新栽梅

唐 白居易

池邊新種七株梅
欲到花時點檢來
莫怕長洲桃李妒
今年好為使君開

梅花塢

唐 陸希聲

凍蘂凝香雪艷新
小山深塢伴幽人
知君有意凌寒色
羞共千花一樣春

梅花

唐羅鄴

繁如瑞雪壓枝開
越嶺吳谿免用裁
却是五侯家未識
春風不放過江來

旅館梅花

唐吳融

清香無以敵寒梅
可愛他鄉獨看來
為憶故谿千萬樹
幾年辜負雪中開

梅

唐崔道融

谿上寒梅初發枝
夜來霜月透芳菲
清光寂寞思無盡
應待琴樽與解圍

春日詠梅花

唐王貞白

靚妝纔罷粉痕新
迢曉風迴散玉塵
若遣有情應悵望
已兼殘雪又兼春

大石嶺驛梅花

唐譚用之

仙中姑射接瑤姬
成陣清香擁路歧
半出驛牆誰畫得

雪英相倚兩三枝

次韻楊公濟奉議梅花

宋蘇軾

梅梢春色弄微和，作意南枝翦刻多。
月黑林間逢縞袂，霸陵醉尉誤誰何。

其二

縞帟練帔玉川家，肝膽清新冷不邪。
穠李爭春猶辦此，更教踏雪看梅花。

再和楊公濟

蘇軾

天教桃李作輿臺故遣寒梅第一開
憑仗幽人收艾納國香和雨入青苔

其二

湖面初驚片片飛尊前吹折最繁枝
何人會得春風意怕見黃梅雨細時

梅花

宋韓駒

江南歲晚雪漫漫
澗谷梅花巧耐寒
幸有幽香當供給
不辭三載滯西安

和張矩臣水墨梅

宋陳與義

粲粲江南萬玉妃，別來幾度見春歸。
相逢京洛渾依舊，惟恐緇塵染素衣。

其二

自讀西湖處士詩，年年臨水看出姿。
晴窓畫出橫斜影，絕勝前邨夜雪時。

梅

陳與義

愛敬纖影上窓紗，無限輕香夜遶家。
一陣東風濕殘雪，

強將嬌淚學梨花

梅花

陳與義

鐵面蒼髯洛陽客
玉顏紅領會稽仙
街頭相見如相識
恨滿東風意不傳

梅

宋孫覲

北風翦水玉花飛
翠袖凌寒不自持
脈脈含情無一語
水邊籬落立多時

其二

纖纖蘿蔓牽茅屋細細苔花點石缸夢斷酒醒山月吐
一枝疎影卧東窓

梅

宋朱子

姑射仙人冰雪容塵心已共彩雲空年年一笑相逢處
長在愁煙苦霧中

梅花絕句

朱子

幽壑潺湲小水通茅茨煙雨竹籬空梅花亂發籬邊樹
似寄寒枝恨朔風

雨後東郭排岸司申梅開方及三分戲書小絕

令一面開燕

宋 范成大

雨入南枝玉蘂皴
合江雲冷凍芳塵
司花好事相邀勒
不著笙歌不肯春

北城梅為雪所禁

范成大

凍蘂粘枝瘦欲乾
新年猶未有春看
雪花祇欲欺紅紫
不道梅花也怕寒

觀梅至花溼高端叔解元見尋

宋陸游

春煖山中雲作堆
翁艇子出尋梅
不須問信道傍叟
但覓梅花多處來

梅花絕句

陸游

當年走馬錦城西
曾為梅花醉似泥
二十里中香不斷
青羊宮到浣花谿

其二

聞道梅花圻曉風
雪堆遍滿四山中
何方可化身千億

一樹梅花一放翁

其三

小亭終日倚闌干
樹樹梅花看到殘
只怪此翁常謝客
元來不是怕春寒

其四

亂蓼桐帽花如雪
斜挂驢鞍酒滿壺
若得丹青如顧陸
憑渠畫我夜歸圖

其五

紅梅過後到緗梅一種春風不並開造物無心還有意
引教日日放翁來

梅花絕句

陸游

探春歲歲在天涯醉裏題詩字半斜今日谿頭還小飲
冷官不禁看梅花

昌英知縣叔作歲坐上賦瓶裏梅花時座上九
人

宋楊萬里

膽樣銀瓶玉樣梅北枝折得未全開為憐落寞空山裏

喚入詩人几案來

其二

雪凍霜封稍欲殘
殷勤折向坐中看
綺疏深閉珠簾密
不遣花愁半點寒

池亭雙樹梅花

楊萬里

開盡梅花半欲殘
兩株晴雪作雙寒
圍欒繞樹元無見
只合池亭隔水看

正月三日驟暖多稼亭前梅花盛開

楊萬里

却緣臘雪勒孤芳
等待晴光灑麝囊
小立樹西人不曾
東風供我打頭香

發通衢驛見梅有感

楊萬里

忙中撩眼雪枝斜
落片紛紛點玉沙
虛過一冬妨底事
不曾款曲是梅花

南齋梅花

楊萬里

朝來早起挂南窓
要看梅花試曉粧
兩樹相挨前後發

老夫一月不燒香

小瓶梅花

楊萬里

梅萼纔開已亂飛，不堪雨打更風吹。
蕭蕭只隔窻間紙，瓶裏梅花總不知。

探梅

楊萬里

山間幽步不勝奇，政是深寒淺暮時。
一樹梅花開一朶，惱人偏在最高枝。

山中見梅

宋戴復古

踏破溪邊一徑苔
好山好竹少人來
有梅花處惜無酒
三嗅清香當一杯

梅邊

宋 何夢桂

江南何處美人家
認似梅花尚恐差
近向梅邊得春信
始知人好似梅花

和王成之梅韻

金 李俊民

朝來一雪幕晴沙
行到前邨始見花
驛使便將春色去
暗香今夜落誰家

憶梅

元 段克己

姑射仙人冰作膚
昔年伴我向西湖
別來幾度春風換
標格而今似舊無

梅花

元 趙孟頫

蕭灑江梅似玉人
倚風無語澹生春
曲中桃葉元非侶
夢裏梨花恐未真

月下觀梅

元 許棫

老樹清谿映白沙
可人竹外一枝斜
黃昏信步前邨去

香到松林賣酒家

癸酉歲晚畱上方觀

元虞集

燈前自了讀殘經
風入疎簾月入櫺
坐到夜深誰是伴
數枝梅萼一銅瓶

漫題

元歐陽玄

鈴索無聲玉漏稀
青綾夜直月侵扉
五更一覺梅花夢
催得江南學士歸

題所貴姪梅

歐陽玄

老樹縱橫出幾條一枝還又亞牆腰西湖湖上掀蓬看
一夜吹香滿六橋

題畫梅

元陳旅

處士橋邊古岸隈梅花偏向小園開衝寒有客尋春去
移得晴窓雪影來

墨梅

元傅若金

天涯不見遙相憶窓外重逢乍欲迷彷彿空山明月夜
一枝初出古牆西

題墨梅

元吳鎮

粲粲江南萬木妃，別來幾度見春歸。
相逢京洛渾依舊，却恨緇塵染素衣。

二月梅花

元洪希文

奪得冰姿過歲華，遠離塵垢迴堪誇。
即今年少多脂粉，只恐春光不稱花。

梅花

元黃鎮成

吟屋蕭疎霜後邛，江頭千樹欲黃昏。
等閒又被春風覺，

添得寒梢月一痕

題梅花扇面寄五十僉憲

元丁鶴年

憶向西湖踏早春萬花如玉月如銀一枝照影臨清淺
滿面冰霜似故人

憶梅

元僧明本

夜分明月是揚州尚有春風在樹頭莫怪當年何水部
歲寒心事與誰愁

評梅

僧明本

月旦花前豈乏人風霜齒頰帶陽春江南野史餘芳論
絕世清如古逸民

別梅

僧明本

花謝東風攪離思愁翻縞袂忍輕分月明梢送臨谿水
春樹遙憐隔暮雲

惜梅

僧明本

香銷泥汙意衰回掠地迴風玉作堆愁絕黃昏無一語
怕看孤月上窓來

剪梅

僧明本

破玉并刀試手溫香凝雙股斷芳魂
花隨燕尾輕分去
不帶春風爪甲痕

苔梅

僧明本

古貌蒼然鶴膝枝唾花生暈護春機
玉堂試看青袍客
莫忘江南有白衣

月梅

僧明本

數枝姑射鬪嬋娟疎影分明不夜天
散却廣寒宮裏桂

春光長滿玉堂前

風梅

僧明本

花間少女翦春寒
粲粲霓裳舞隊仙
月夜遙看環珮冷
莫教吹落玉花鈿

煙梅

僧明本

夢隔梨雲逗曉天
苔枝浮翠逼春寒
不嫌玉質籠輕素
留與詩人冷淡看

茅舍梅

僧明本

數椽茅屋延清客
竹作疎籬護玉葩
不是玉堂無分到
且和明月到山家

隔簾梅

僧明本

庭花映箔眩吟眸
一片湘雲鎖暮愁
風捲黃昏疎影動
珊瑚枝上月如鉤

紙帳梅

僧明本

春融剡雪道人家
素幅凝香四面遮
明月滿牀清夢覺
白雲堆裏見疎花

墨梅

明 王冕

我家洗硯池邊樹，朵朵花開淡墨痕。
不要人誇好顏色，只留清氣滿乾坤。

陌上見梅

明 高啟

陌頭一樹帶風沙，零落寒香日欲斜。
車馬紛紛誰暇看，當年只合種山家。

畫梅

明 牛諒

梨花雲底路參差，折得春風玉一枝。
南雪未消江月曉。

欲從何處寄相思

栽梅

明卓敬

風流東閣題詩客
瀟灑西湖處士家
雪冷江深無夢到
自鋤明月種梅花

梅花

明陸昂

春到南枝與北枝花
開的皚皚照寒漪
何人似解相憐意
不把東風玉笛吹

題梅送友

明徐章

萬樹籠香障白雲孤山深處隔塵氛玉顏為惜君歸去
却向東風瘦幾分

看梅偶成

明林俊

消息東風兩月前西湖索寞老逋仙雪蓬昨夜還扶醉
移近梅花一處眠

禁中梅花

明羅倫

一段清香藹禁闈幾枝疎影照寒輝玉堂不讓孤山趣
雪骨冰肌對紫微

惜梅

明王弼

獨樹牆西老更繁幾回相伴月黃昏
東風只為芳菲計不道飛花已滿園

湖上梅花歌

明王穉登

山煙山雨白氤氲梅葉梅花濕不分
渾似高樓吹笛罷半隨流水半為雲

其二

虎山橋外水如煙雨暗湖昏不繫船
此地人家無玉厯

梅花開日是新年

其三

聞道湖中盡是梅
兩山千種一時開
估客片帆春雨裏
載將香氣過湖來

王元章倒枝梅畫

明徐渭

皓態孤芳歷俗姿
不堪復寫拂雲枝
從來萬事嫌高格
莫怪梅花著地垂

梅

明陳繼儒

邨邊楊柳已拖黃一路雲深舊講堂
偶向梅花邨裏度芒屨到處雪痕香

畫梅

明僧大遂

古幹橫斜意自奇半開半藥亦相宜
寒時悔不前邨覓知是谿橋第幾枝

詠梅

明項蘭貞

冰玉孤清世外姿娟娟新月上疎枝
無情短節休輕弄未是春風點額時

附紅梅

五言古

于仲元舍賦紅梅

元虞集

白雪不成夜丹霞遂
崇朝妙質承日映
飛英向風飄醉來
紅袖近歌罷綵雲
消揚州問何遜何
似董嬌嬈

七言古

望京府賞紅梅

元郝經

汴梁宮中絳綃梅
移向汴河堤上栽
青條團搭杏花顙

瑣細向陽才半開張公小隊呼我飲風色偃髯寒氣凜
玉銜徑踏黃河冰貂帽颯簷掀紫錦金鞍細馬歌舞人
雪壓小橋不動塵入門下馬簇花宴紅蓮舊府花正新
玉川金波碧香酒折花徧挿分素手春透寒梢未全綻
風流正要臙脂瘦賞梅不用歌落梅緩歌却著銀笙催
愛香細擷生霞蘂浮動雲腴嚼一杯本是前邨冷淡花
不稱王侯將相家明朝會散更向明月底藉雪凍吟疎
影裏

五言律

紅梅

宋 石延年

梅好唯傷白，今紅是絕奇。
認桃無綠葉，辨杏有青枝。
烘笑從人贈，酡顏任笛吹。
未應嬌意急，發赤怒春遲。

七言律

紅梅

宋 王安石

結子非貪鼎，鼎嘗偶先紅。
杏占年芳從教臘，雪埋藏骨
却恐春風漏洩香。不御鉛華知國色，祇裁雲縷想仙粧。

少陵為爾牽詩興可是無心賦海棠

紅梅

宋蘇軾

怕愁貪睡獨開遲自恐冰容不入時故作小紅桃杏色
尚餘孤瘦雪霜姿寒心未肯隨春態酒暈無端上玉肌
詩老不知梅格在更看綠葉與青枝

其二

雪裏開花却是遲如何獨占上春時也知造物含深意
故與施朱發妙姿細雨浥殘千顆淚輕寒瘦損一分肌

不應便雜天桃杏半點微酸已著枝

其三

幽人自恨探春遲不見檀心未吐時
丹鼎奪胎那是寶玉人頰頰更多姿
抱叢暗葉初含子落盞醲香已透肌
乞與徐熙畫新樣竹間璀璨出斜枝

立春日賞紅梅

元元淮

昨夜東風轉斗杓陌頭楊柳雪纔消
曉來一樹如繁杏開向孤邨隔小橋
應是化工嫌粉瘦故將顏色助花嬌

青枝綠葉何須辨萬卉叢中奪錦標

觀閒閒齋紅梅次蘇公安字韻

元袁 楠

雲閣香溫睡覺遲不堪殘角曉鐘時
玉妃瓊屑難為從
青女鉛華敢弄姿可怪鮫綃能幻色
誰將猩血解填肌
團團似就迴文錦薄暮凝愁下翠枝

次韻羅雲叔紅梅

元楊 載

玉人中酒殢芳華盡壓東風百種花
襖被冬深裁異錦

篝燈夜永障輕紗
纖絳露沁蜂腰
蠟密藥雲蒸鶴頂砂
為問閒風何處在
相期高舉爾晨霞

紅梅

元謝宗可

梨雲無夢倚黃昏
薄倩朱鉛蝕淚痕
宿酒破寒薰玉骨
仙丹偷暖返冰魂
茜屐影露羅衣卷
霞佩香封縞袂溫
回首孤山斜照外
尋真誤入杏花邨

紅梅

明雷思霈

似是梨花靠杏芽
又飛柳絮裹桃花
嫌山紺雪仙娥頰

玉座丹砂道士家豈為穠香非素質故將冰蘂當鉛華
廣平心事渾如鐵作賦何妨嫵媚奢

五言絕句

紅梅

明王冕

深院春無限香風吹綠漪玉妃清夢醒花雨落臙脂

七言絕句

紅梅

唐羅隱

天賜臙脂一抹腮盤中磊落笛中哀雖然未得和羹便

曾與將軍止渴來

謝關景仁送紅梅栽

宋蘇軾

年年芳信負紅梅江畔垂垂又欲開
珍重多情關令尹直和根撥送春來

紅梅

宋毛澤民

好處曾臨阿母池
渾將絳雪點寒枝
東牆羞頰逢人笑
南國酡顏強自持

紅梅

元丁鶴年

姑射仙人鍊玉砂
丹光晴貫洞中霞
無端半夜東風起
吹作江南第一花

紅梅

元 楊維禎

羅浮仙子宴瑤宮
海色生春醉靨紅
十二闌干明月夜
九霞帳煖睡東風

紅梅

明 王冕

玉妃步月影毵毵
燕罷瑤池酒正酣
半夜不知香露冷
春風吹夢過江南

紅梅

王冕

昭陽殿裏醉春風，香隔瓊簾映淺紅。
翠袖擁雲扶不起，玉簫吹過小樓東。

紅梅圖為肇和題

明羅玘

西湖殘雪候多時，却恨前年被雪欺。
且學杏花紅似錦，暫招鳴鳥到南枝。

紅梅

明徐水軒

輕盈弄月醉霞觴，嬌軟酡顏褪晚粧。
縞素叢中紅一點，

好花終是不尋常

題畫紅梅

明僧德祥

三百年來處士家
酒旗風裏一枝斜
斷橋荒蘚無人問
顏色如今似杏花

附梅子

七言律

食梅

明費宏

夏木陰陰雨氣寒
半黃肥顆摘林端
齒輸赤子先拚軟

眉為蒼生故自攢調劑功微慚玉鉉賜沾恩重憶金盤
一株留取當階樹贏得花時索笑看

七言絕句

新晴西園散步

宋楊萬里

紅雨斑斑竹外蹊黃金嫋嫋水邊絲舉頭揀遍低陰處
帶葉青梅摘一枝

謝靜遠惠蜜梅

元顧瑛

江南煙雨未全黃誰使青酸墮蜜房娥媚已能知魏證

典型時復見中郎



御定佩文齋詠物詩選卷二百九十七



總校官庶吉士臣侍

朝

校對官庶吉士臣嚴

福

謄錄監生臣繆

謨

欽定四庫全書薈要

集部

御定詠物詩選卷

二百九十八至
三百六

欽定四庫全書會要卷一萬八千九百二十一

集部

御定佩文齋詠物詩選卷二百九十八

李花類

五言古

麥李

梁沈約

青玉冠西海碧石彌外區化為中園實其下成路衢在
先良足貴因小邈難逾色潤房陵縹味奪寒水朱摘持
欲以獻尚食且踟躕

詠李

陳江總

嘉樹春風早春風花落新但見成蹊處幾得正冠人當
知露井側復與天桃鄰

賦得李

唐太宗

玉衡流桂圃成蹊正可尋鶯啼密葉外蝶戲脆花心麗
景光朝彩輕霞散夕陰暫顧奎章側遠眺靈山林

道州城北樓觀李花

唐呂溫

夜疑關山月曉似沙場雪曾使西域來幽情坐超越將

念浩無際欲言忘所說豈是花感人自憐抱孤節

七言古

李花

唐 韓愈

當春天地爭奢華洛陽園苑尤紛拏誰將平地萬堆雪
剪刻作此連天花日光赤色照未好明月暫入都交加
夜領張徹投盧仝乘雲共至玉皇家長姬香御四羅列
縞袞練帨無等差靜濯明粧有所奉顧我未肯置齒牙
清寒瑩骨肝膽醒一生思慮無由邪

五言律

李

唐李嶠

潘岳閒居日王戎戲陌辰
蝶遊芳徑馥鶯嚙弱枝新
葉暗青房晚花明玉井春
方知有靈榦時用表真人

子直晉昌李花得分字

唐李商隱

吳館何時熨秦臺幾夜熏
綃輕誰解卷香異自先聞
月裏誰無妙雲中亦有君
樽前見飄蕩愁極客襟分

李

宋司馬光

嘉李繁相倚園林澹泊春齊紈剪衣薄吳紵下機新色
與晴光亂香和露氣勻望中皆玉樹環堵不為貧

七言律

李

明楊基

憶與盧仝共看來花光月色兩徘徊江邨遠處長相識
風雨寒時已早開霽雪玲瓏愁易濕春冰輕薄笑難裁
江城二月城西路誰惜柔香滿翠苔

李

明吳寬

蕭森何處為昇來曾帶荒園宿土培燥壤豈勞長甕灌
低枝不礙短籬開敢將艷色誇桃樹勝要清陰乞柳栽
賴有當時仙種語為薪莫漫比樗材

李花

明
王世貞

鄠曲千林花事新一枝嬌婉出風塵歌穠處處傳遊騎
報玖時時憶故人露井漫為桃悵恨煙江未損玉精神
青旗沽酒堪相趁為惜芳菲向晚春

五言絕句

探得李

唐太宗

盤根直盈藩交幹橫倚天舒華光四海卷葉蔭三川

七言絕句

嘉慶李

唐白居易

東都綠李萬州栽君手封題我手開
把得欲嘗先悵望與渠同別故鄉來

李徑

唐陸希聲

一徑濃芳萬藥攢風吹雨打未摧殘
憐君盡向高枝發

應為行人要整冠

讀退之李花詩

宋楊萬里

近紅暮看失
臙脂遠白宵
明雪色奇花
不見桃惟見
李
一生不曉退之詩

李

楊萬里

李花宜遠更宜繁
惟遠惟繁始足看
莫學江梅作疎影
家風各自一般般

昌平道中

明袁宏道

菴前乞得老僧茶一派垂楊十里沙烏籠白藍憑揀取
麝香李子枕頭瓜

御定佩文齋詠物詩選卷二百九十八

欽定四庫全書薈要卷一萬八千九百二十一

集部

御定佩文齋詠物詩選卷二百九十九

杏花類

五言古

杏花

北周庾信

春色方盈野
枝枝綻翠英
依稀映邨塢
爛熳開山城
好折待賓客
金盤襯紅瓊

杏塢

明袁凱

窈窕石徑深參差繁英滿發采已云奇生香殊未斷依
依午橋路粲粲朱陳阪月色散疎景時時坐橫管

五言律

杏花

唐
溫憲

團雪上晴梢江明映碧寥店香風起夜邨白雨休朝靜
落頻沾帶繁開正蔽條澹然閒賞翫無以破妖韶

杏花

唐
卜谷

不學梅欺雪輕紅照碧池小桃新謝後雙燕却來時香

屬登龍室煙籠宿蝶枝臨軒須貌取風雨易離披

詠杏花

唐孫何

殷紅鄙桃艷淡白笑梨花落處飄微霰繁時疊碎霞苑
宜開帝里壇稱在儒家麗日明珠箔清香襲絳紗

杏花

明申時行

坊開裴野錦花發董林株望欲迷瓊苑栽宜近白榆微
風舒露臉小雨濕煙鬚春意枝頭鬧從教醉玉壺

五言排律

曲江亭望慈恩寺杏園花發

唐李君何

春晴凭水軒
仙杏發南園
開藥風初曉
浮香景欲暄
光華臨御陌
色相對空門
野雪遙添淨
山煙近借繁
地閒分柰苑
景勝類桃源
况值新晴日
芳枝度彩鴛

七言律

杏花

唐溫庭筠

紅花初綻雪花繁
重疊高低滿小園
正見盛時猶悵望
豈堪開處已繽紛
翻情為世累
詩千首醉是吾鄉酒
一樽

杳杳艷歌春日午出牆何處隔朱門

杏花

唐
吳融

粉薄紅輕揜斂羞花中占斷得風流軟非因醉都無力
疑不成歌亦自愁獨照影時臨水畔最含情處出牆頭
徘徊盡日難成別更待黃昏對酒樓

途中見杏花

吳
融

一枝紅艷出牆頭牆外行人正獨愁長得看來猶有恨
可堪逢處更難留林空色暝鶯先到春淺香寒蝶未遊

更憶帝鄉千萬樹
淡煙籠日暗神州

杏花

唐羅隱

暖觸衣襟漠漠香
間梅遮柳不勝芳
數枝艷拂文君酒
半里紅歌宋玉牆
盡日無人疑悵望
有時經雨乍淒涼
舊山山下還如此
回首東風一斷腸

杏花

宋林逋

蓓蕾枝梢血點乾
粉紅腮頰露春寒
不禁煙雨輕歌著
祇好亭臺愛惜看
偎柳傍桃斜欲墜
等鶯期蝶猛成團

京師巷陌新晴後賣得風流更一盤

郡圃杏花

宋楊萬里

小樹嫣然一兩枝晴熏雨醉總相宜纔憐欲白仍紅處
政是微開半吐時得幸東風無忌對主張春色更還誰
海棠穠麗梅花淡不是渠儂別樣奇

張邨杏花

金元好問

昨日櫻桃絳蠟痕今朝紅袖已迎門只應芳樹知人意
畱著殘粧伴酒尊穠李尚須羞粉艷寒梅空自怨黃昏

詩家元白無今古從此張邨即趙邨

城外見杏花

元
吳師道

曲江二十年前會回首芳菲似夢中老去京華度寒食
閒來野水看東風樹頭絳雪飛還白花外青天映更紅
聞說琳宮更佳絕明朝攜酒訪城東

杏

明
吳寬

花信風寒已早來隔牆俄見赤雲堆並頭兩樹長相倚
屈指三春始得開曲水少年誰復探公門今日要兼栽

莫言結實供人啖破核還堪作藥材

杏

明
朱謀晉

二月燒林發絳英六街初有賣花聲黃鸝立亞高枝雨
紫燕飛來小樹晴邨僻深藏沽酒旆樓高金露約簾旌
年年開徧曲江寺香在馬蹄歸處生

五言絕句

遊春曲

唐
王涯

萬樹江邊杏新開一夜風滿園深淺色照在綠波中

邨西杏花

唐司空圖

肌細分紅脈香濃破紫苞無因畱得翫爭忍折來拋

思歸樂

唐韓偓

晚日催絃管春風入綺羅杏花如有意偏落舞衫多

春雪初霽杏花正芳月夜閒吟

唐唐彥謙

霽景明如練繁英杏正芳姮娥應有語悔共雪爭光

牆頭杏花

元宋无

紅杏西鄰樹過牆無數花相煩問春色端的屬誰家

七言絕句

重尋杏園

唐白居易

忽憶芳時頻酩酊却尋醉處重徘徊
杏花結子春深後誰解多情又獨來

杏花

唐元稹

常年出入右銀臺每怪春光例早回
慚愧杏園行在景同州園裏也先開

杏園

唐杜牧

夜來微雨洗芳塵公子驂騮步貼勻
莫怪杏園顛顚去滿城多少插花人

杏花

唐薛能

活色生香第一流手中移得近青樓
誰知艷性終相負亂向春風笑不休

故鄉杏花

唐司空圖

寄花寄酒喜新開左把花枝右把杯
欲問花枝與杯酒

故人何得不同來

杏花

司空圖

詩家偏為此傷情
品韻由來莫與爭
解笑亦應兼解語
只應慵語倩鶯聲

曲江紅杏

唐鄭谷

遮莫江頭柳色遮
日濃鶯睡一枝斜
女郎折得殷勤看
道是春風及第花

杏花

唐羅隱

暖氣潛催次第春
梅花已謝杏花新
半開半落閒園裏
何異榮枯世上人

杏花

宋王禹偁

紅芳紫萼怯春寒
蓓蕾粘枝密作團
記得觀燈鳳樓上
百條銀燭露闌干

其二

暖映垂楊曲檻邊
一堆紅雪罩春煙
春來自得風流伴
榆莢休拋買笑錢

其三

桃紅李白莫爭春，素態妖姿兩未勻。
日暮牆頭試回首，不施朱粉是東鄰。

其四

登龍曾入少年場，錫宴瓊林醉御觴。
爭戴滿頭紅爛熳，至今猶雜桂枝香。

杏花

宋 王安石

垂楊一徑紫苔封，人語蕭蕭院落中。
獨有杏花如喚客，

倚牆斜日數枝紅

北陂杏花

王安石

一陂春水遶花身
花影妖嬈各占春
縱被春風吹作雪
絕勝南陌碾成塵

徐熙杏花

宋蘇軾

江左風流王謝家
盡攜書畫到天涯
却因梅雨丹青暗
洗出徐熙落墨花

都中冬日

宋戴復古

脫却鸛裘付酒家
忍寒圖得醉京華
一冬天氣如春暖
昨日街頭賣杏花

宮詞

宋
花藥夫人

小雨霏微潤綠苔
後闌紅杏傍池開
一枝插向金瓶裏
捧進君王殿上來

杏花

宋
朱淑真

淺注顰脂剪絳綃
獨將妖艷冠花曹
春心自得東皇意
遠勝玄都觀裏桃

杏花雜詩

金元好問

嫋嫋纖條映酒船
綠嬌紅小不勝憐
長年自笑情緣在
猶要春風慰眼前

其二

暖日園林可散愁
每逢花處儘遲留
青旗知是誰家酒
一片春風出樹頭

其三

紛紛紅紫不勝稠
爭得春光競出頭
却是梨花高一着

隨宜梳洗儘風流

其四

露浥清華粉自添
隔谿遙見玉簾苫
眼看桃李飄零盡
更揀繁枝插帽簷

其五

紅粧翠蓋惜風流
春動香生不自由
莫向芸齋厭閒冷
小詩供作錦纏頭

小園卽事

元
陳
深

淡黃楊柳著煙輕細草茸茸觀履行行到水邊心會處
夕陽一樹杏花明

南園杏花

元
元
淮

臙脂萬點怯輕寒蓓蕾枝頭絳雪乾昨夜南園春雨過
玉人曉起揭簾看

青杏

元
張弘範

落盡殘紅綠滿枝青青如豆釀酸時佳人摘得新嘗怯
一點春愁鎖畫眉

寫杏花自題絕句

明陳鐸

晴團紅粉護春煙
彷彿江邨二月天
記得景卿回首處
一枝斜拂酒樓前

瓶花

明孫承宗

高牙風峭戟枝寒
杏蘂新香春未闌
却憶韋家花樹會
關城初向一瓶看

杏花

明申時行

上林佳處午橋邊
半染頽霞半着煙
記得曲江春日裏

一枝曾占百花先

杏花

明張新

曲江池畔題詩處燕子飛時花正開
報道狀元歸去也
馬頭春色日邊來

御定佩文齋詠物詩選卷二百九十九

欽定四庫全書薈要卷一萬八千九百二十二

集部

御定佩文齋詠物詩選卷三百

梨花類

五言古

詠池上梨花

齊王融

翻階沒細艸集水間疎萍芳春照流雪深夕映繁星

和池上梨花

齊劉繪

露庭晚翻積風閨夜入多縈叢似亂蝶拂燭狀睽蛾

詠梨應詔

梁沈約

大谷來既重岷山道又難摧折非所恡但令入玉盤

於座應令詠梨花

梁劉孝綽

玉壘稱津潤金谷詠芳菲詎匹龍樓下素蕊映華扉
雜雨疑霰落因風似蝶飛豈不憐飄墜願入九重闈

奉梨

北周庾信

接枝秋轉脆含情落更香擎置仙人掌應添瑞露漿

梨花

宋黃庭堅

沙頭十日春當年誰手種風飄香未改雪壓枝自重看
花思食實知味少人共霜降百工休把酒約寬縱

梨花

金元好問

梨花如靜女寂寞出春莫春工惜天真玉頰洗風露素
月淡相映蕭然見風度恨無塵外人為續雪香句孤芳
忌太潔莫遣凡卉妬

次韻官堂學士冬日紅梨花

元程鉅夫

黃菊卧階雨六花舞天風辟凍室生白手僵肉作紅秀

句忽墮前光怪侵簾櫳至人晏坐處元氣含冲融無情
及枯株嫣然為修容坐令玉華君來從蕊珠宮麗粧凝
祥雲明眸轉驚鴻豈非散花手試君情所鍾老我嗜好
淡空詩亦雷同祇願酌花時毋忘比鄰翁

七言古

千葉紅梨花

宋

歐陽修

紅梨千葉愛者誰白髮郎官心好奇徘徊遶樹不忍折
一日千帀看無時夷陵寂寞千山裏地遠氣偏時節異

愁煙苦霧少芳菲
野卉蠻花鬪紅紫
可憐此樹生此處
高枝絕艷無人顧
春風吹落復吹開
山鳥飛來自飛去
根盤樹老幾經春
真賞今纔遇使君
風輕絳雪罇前舞
日暖繁香露下聞
從來奇物產天涯
安得移根植帝家
猶勝張騫為漢使
辛勤西域徙榴花

五言律

梨花

金 龕 鑄

孤潔本無匹
誰令先衆芳
花能紅處白
月共冷時香
縞

袂清無染冰姿淡不粧夜來清露底萬顆玉毫光

七言律

梨花

金張建

蠹樹枝高茁朶稠嫩苞開破雪搓毬碎粘粉紫鬚齊吐
潤卷丹黃葉半抽月影曉窓畱好夢雨聲深院鎖清愁
瓊胞已實香猶在散入長安賣酒樓

醉梨

元劉因

白雪春香洗未殘玄霜誰遣凍成團漆封圓顆盤增滑

蜜和濃漿齒避寒綠螳從今忘病渴金花無地著餘酸
快人風味依然在莫作尋常軟熟着

秋日梨花

元
張養浩

雪香吹盡樹頭春誰遣西風為返魂月影已非前日夢
雨容獨帶舊時痕只知秋色千林老爭信陽和一脈存
莫訝殷韓太多事仙家元不計寒暄

梨

明
吳寬

名果先從張谷來紛紛碎雪欲成堆淡粧自把蛾眉掃

巧笑誰將瓠齒開
園子豈求他種接
主人能使及時栽
天桃灼灼驚凡目
縞素應甘自不材

五言絕句

左掖梨花

唐王維

閒灑堦邊草
輕隨箔外風
黃鶯弄不足
銜入未央宮

左掖梨花

唐丘為

冷艷全欺雪
餘香乍入衣
春風且莫定
吹向玉階飛

左掖梨花

唐皇甫冉

巧解迎人笑偏能亂蝶飛春風時入戶幾片落朝衣

梨花

唐錢起

艷靜如籠月香寒未逐風桃花徒照地終被笑妖紅

左掖梨花

唐武元衡

巧笑解迎人晴雪花堪惜隨風蝶影翻誤點朝衣赤

梨花

宋王十朋

淡客逢寒食煙邨爛漫芳謫仙天上去白雪世間香

七言絕句

鄆杜郊居

唐
溫庭筠

槿籬芳援近樵家
攏來青青一徑斜
寂寞遊人寒食後
夜來風雨送梨花

梨花

宋
韓琦

風開笑頰輕桃艷
雨帶啼痕自玉容
蝶舞只疑殘靨墜
月明唯覺異香濃

梨花

宋
張舜民

青女朝來冷透肌
殘春小雨更霏微
流鶯怪底爭來往

為擲金梭織玉衣

梨花

宋
陸游

開向春殘不恨遲
綠楊窳地最相宜
征西幕府煎茶地
一幅邊鸞畫折枝

其二

粉淡香清自一家
未容桃李占年華
常思南鄭清明路
醉袖迎風雪一杈

梨花

宋
謝逸

冷香銷盡晚風吹脈脈無言對落暉舊日郊西千樹雪
今隨蝴蝶作團飛

其二

翦翦輕風漠漠寒玉肌蕭瑟粉香殘一枝帶雪牆頭出
不用行人著眼看

梨花

金
呂中孚

等待清明得得芳團枝晴雪暖生香洗粧自有風流態
却笑紅深睡海棠

梨花

明文徵明

物華無賴酒初醒
奕奕梨花照晚晴
怪底山禽啼不歇
十分春色近清明

梨花

明張鳳翼

重門寂寂鎖香雲
雨滴空階坐夜分
老去微之風調在
折來何處與雙文

御定佩文齋詠物詩選卷三百

欽定四庫全書薈要卷一萬八千九百二十三

集部

御定佩文齋詠物詩選卷三百一

栗類

七言律

栗熟

宋
朱子

樹雜椅桐繼國風莫教林下長蒿蓬

種樹法栗下不得有艸木

共期

秋實充腸飽不羨春華轉眼空病起數升傳藥錄

本草云人

有脚弱往栗樹下啖及數升遂能起行

晨興三燕學仙翁

蘇黃門詩云老去自添腰脚病

山翁服栗舊傳方客來為說
晨興晚三咽徐收白玉漿

櫻桃浪得銀絲薦一笑纔

堪發面紅

銀絲見杜詩本艸云櫻桃服之令人美顏色

新栗寄雲林

元張雨

竭來常熟嘗新栗黃玉穠分紫殼開果園坊中無買處
頂山寺裏為求來囊盛稍共來禽帖酒薦深宜蘸甲杯
首奉雲林三百顆也勝酸橘寄書回

七言絕句

山禽

唐張籍

山禽毛如白練帶棲我庭前栗樹枝
獼猴半夜來取果
一雙中林向月飛

御定佩文齋詠物詩選卷三百一